



16. august 2019

UKA2019/52

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matu-muuna saqqummiuppara:

Pisortat suliffeqarfiutaasa ingerlatseqatigiiffiit tamakkiisumik ilaannakoortumilluunniit Namminersorlutik Oqartussanit pigineqartut sorliit namminersortunngorsarneqarsinnaanerit pillugu misissuineq tunngavigalugu nassuiaammik saqqummiusseqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Misissuineq kingusinnerpaamik UPA2020-mi Inatsisartunut saqqummiunneqassaaq.
(Inatsisartunut ilaasoraq Steen Lyngé, Demokraatit)

Tunngavilersuut

Demokraatit politikikkut anguniagaraa Kalaallit Nunaat aningaasaqarnikkut nammineq napatittoq, Qallunaat Nunaat-niit EU-miillu aningaasatigut kiffaanngissuseqartoq.

Uagut isitsinnit aningaasaqarnikkut namminersorneruneq isumaqarpoq, sapiissuseqarluni aaliangersinnaaneq inuiaat aningaasaqarnerannut iluaqutaasussamik. Tamannalu eqqartorneqartillugu maannakkumut akimmiffiusarpoq allaffissorneq nunatsinni annertuallaarmat. Aningaasaqarneq nammineq napatittoq namminersorlutik inuussutissarsioritunit annertuutigit aallaaveqartarpoq, taamaattumik pingaaruteqarluinnarpoq sinaakkutinik pitsaasunik pilersitsinissarput namminersorlutik inuussutissarsioritunit alliaartorsinnaanerit aqutissiuussisussamik, aammalu tamakkiisumik tamakkiisumiinngitsumilluunniit suliffeqarfiit pisortanit pigineqartut pimooruluugu namminersortunngorsarneqarsinnaaneri marsissallugit pingaarpoq

Suliffeqarfiit pisortanit pigineqartut politikikkut aaliangersakkanik niuernermiillu pisunik aningaasatigut pissarsiffigineqartarput. Politikikkut aaliangersaanerit amerlanersaat pilersuisussaataitanermit aallaaveqartarput, nunatsinnilu najugaqariaatsimut atalluinnarluni. Tamannalu isumaqarpoq nuna tamakkerlugu isigigaanni niuerfinni arlaqartuni suliffeqarfik ataaseq kisimi inissaqartoq, taamaasilluni pisariaqartinneqartut sulliviit marluk amerlanerilluunniit unammilleqatigiikkaluarpata aningaasatuutit matussutissaqartinneqanngillat. Imaangilarli niuerfimmiissasut sulliviit pisortanit pigineqartut.

Demokraatinit isumaqarpugut, niuerfik namminersorlutik inuussutissarsioritunit isumagineqarsinnaasoq. Misissuinerit misilittakkallu takutippaat pisortanit kiffartuussineq 30%-mik akisunerusoq unammilleqatigiinnermit atugassarititanut sanilliullugu. Allatut oqaatigalugu aningaasatigut isumatusaarneruvoq unammilleqatigiinneq pilersinneqarnissaa pisortaarfiiit suliamut kiffartuussineranit taarsiullugu. Qularnanngilaq namminersortunngorsaaneq iluatsippat kingunerissagaa pitsanngorsaanerit kiisalu piffissaq ungasinnerusoq isigalugu pikkorinnerulerneq tassami ingerlatseqatigiiffiit niuerfinit



unammillerneqalersussaammata taamaasillutillu tunniussisariaqalerlutik aaqqiinernik pitsaanerusunik akikinnerusunillu.

Taamaasilluta uuma siunnersuutip qitianut peqqippugut. Demokraatit isumaqarpugut inuiannut aningaasanik sipaarutaassasoq suliffeqarfiit pisortanit pigineqartut arlallit namminersortunngorsarneqarpata.

Taamaattorli namminersortunngorsaaniaannarluni namminersortunngorsaasoqassanngilaq. Aningaasaqarnikkut iluanaaruteqarnissamik tunngaveqassaaq. Tassunga assersuutissatsialaavoq Namminersorlutik Oqartussat Air Greenlandimut pigineqataassutsinik pisinerat Demokraatit tapersersungaannik. Tassami imaalersimagaluarpoq Namminersorlutik Oqartussat aningaasaliissuteqarnissamut ineriartortitsinissamillu kissateqarnerat allanit pigineqataasunit killilersorneqalersimagaluarluni agguagarsiassat pingaernerutinneqarsimmata. Taamaattumik Air Greenlandimi pigineqataassutsit pisiniarinerat eqqortuliorneruvoq ingerlatseqatigiiffimmik pitsaasumik ineriartortitsinissaq qularnaarumallugu. Imaanngilarli Air Greenland naassaanngitsumik Namminersorlutik Oqartussanit pigineqassasoq.

Oqaatigissavara UKA 2016-mi Inatsisartut isumaqatigiillutik siunnersuut taamatorluinnaq qulequtalik akuerinikummassuk taamaattumik naatsorsuutigisariaqarpoq Naalakkersuisut suliaq ingerlatereersimassagaat 2018-mi ukiakkut Inatsisartunut qinersinissaq suarutigineqarnissaata tungaanut. Tamanna uppernarsarneqarpoq § 37 naapertorlugu apeqqummut normu 238/2019-mut akissummi.

Tamanna tunngavigalugu kissaatigaarput nassuiaasioorneq ingerlaqqissasoq suliarlu kingusinnerpaamik UPA 2020-mi saqqummiunneqarluni, ajornanngippalli siusinnerusumik.

Taamatut oqaaseqarlunga qilanaarpunga Naalakkersuisut akissuteqarnissaannut kiisalu partiit sinnerisa saqqummiussassaannut.

Pisortanut aningaasaqarnikkut allaffissornikkullu kingunerisassai

Misissuineq aningaasartuutitaqassaaq. Naatsorsuutigisariaqarpoq suliaq annersaa UKA2016/57-p akuerineqarneranut atatillugu suliarineqareersimassasoq, tamannalumi uppernarsarneqarpoq § 37 naapertorlugu apeqqut normu 238/2019-mut akissummi. Tassunga akissummi takuneqarsinnaavoq aamma suliaq sinnera Siulittaasoqarfiup ingerlanneqarneranut aningaasaliissutaareersunit akilerneqarsinnaasoq.

Inuussutissarsionermut aningaasaqarnikkut allaffissornikkullu kingunerisassai

Soqanngilaq

Innuttaasunut aningaasaqarnikkut allaffissornikkullu kingunerisassai

Soqanngilaq.